



المسلم وربّه تعالى

So Muslim a go so Kadnan Iyan

(al Khutbah 1)

Ki: Alim Hassanor bin Maka Alapa

al Murshid al Am

al Insan Islamic Assembly of the Philippines

إِنَّ الْحَمْدَ لِلَّهِ نَحْمَدُهُ وَنُسْتَعِينُهُ وَنَسْتَغْفِرُهُ وَنَعُوذُ بِاللَّهِ مِنْ شُرُورِ أَنْ فَسِنَا وَسَيِّئَاتِ
أَعْمَالِنَا مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَنْ تَجِدَ لَهُ وَلِيًّا مُرْشِدًا ، وَأَشْهَدُ أَلَّا إِلَهَ
إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ ، اللَّهُمَّ صَلِّ وَسَلِّمْ وَبَارِكْ
عَلَى مُحَمَّدٍ صَلَّى اللَّهُ عَلَيْهِ وَسَلَّمَ وَعَلَى آلِهِ وَصَحْبِهِ وَمَنْ اهْتَدَى بِهَدْيِهِ إِلَى يَوْمِ
الدِّينِ . . . وَبَعْدُ:

فِيَا عِبَادَ اللَّهِ يَقُولُ الْحَقُّ تَبَارَكَ وَتَعَالَى فِي الْقُرْآنِ الْكَرِيمِ:

قُلْنَا اهْبِطُوا مِنْهَا جَمِيعًا فَإِمَّا يَأْتِيَنَّكُمْ مِنِّي هُدًى فَمَنْ تَبِعَ هُدَايَ فَلَا خَوْفٌ عَلَيْهِمْ
وَلَا هُمْ يَحْزَنُونَ.

Innalhamda lillāhi nahmaduhu wa nastānuhu wa nastagfiruh, wa na'ūdubillāhi min shurūri anfusinā wa sayyiāti a'mālinā, man yahdihillāhu falā mudhillalahu, wa may yudhlil falan tajida lahu waliyyan murshidā, wa ash'hadu allā ilāha illallāhu wahdahu lā sharīka lahu, wa ash'hadu anna Mohammadan abduhu wa rasūluh, Allāhumma salli wa sallim wa bārik alā Mohammadin sallallāhu alayhi wa sallama wa alā ālihi wa sabhihi wa manihtadā bihad'yihī ilā yawmidd dīn wa ba'du:

Fayā ibādallāhi, Yaqūlul Haqqu Tabāraka wa Ta'ālā fil Qur'ānil Karīm:

Qulnah bitū minhā jamīan fa'immā ya'tiyannakum minnī hudan faman tabi'a hudāya falā khawfun alayhim wa lā hum yahzanūn.

So langowan a podipodi ago so samporna a bantog na rk o Allāh (سُبْحَانَهُ وَتَعَالَى), bantogn tano Skaniyan go mamangni tano ron sa tabang, ago mangni tano Ron sa sapngan Iyan so manga dosa tano, go lomindong tano ko Allāh (سُبْحَانَهُ وَتَعَالَى) phoon ko manga antiyor o manga ginawa tano, ago so pangararata o manga galbk tano, sa taw a toroon skaniyan o Allāh (سُبْحَانَهُ وَتَعَالَى), na da' a makadadag on, na sa taw a dadagn iyan na dingkadn mitoon sa salinggogopa' iyan a phakatoro' on.

Manga Oripn o Allāh.

So Islam na inisogo' iyan ko Muslim, sii dn sa paganay, so kabaloy niyan a tanto a go sangat a miaratiaya sii ko Allāh (سُبْحَانَهُ وَتَعَالَى), a mikokoyapt on sa mabagr, a go katatadman iyan sa lalayon a go aya niyan sasarigan ko langowan taman, sii ko masa a gii niyan kanggalbka ko kamapiyaan o ginawa niyan. Paliogat ko Muslim a magdam iyan sii ko piaganakanakan o poso' iyan a mataan a skaniyan na mapagiino niyan a go aarapn iyan so tabang on o Allāh (سُبْحَانَهُ وَتَعَالَى), minsan pn maggdam iyan a skaniyan na gaos a go mabagr ko kathonaya niyan ko manga pangindaw niyan a barandiya antaa ka rahasiyan sabap ko g's iyan a tamok a go kadato'.

So thitho a miaratiaya a Muslim na lalayon dn makapagiiyasa a go mapopokaw niyan so pikir iyan a go so darm iyan sii ko kaggdama niyan ko kala' o Allāh (سُبْحَانَهُ وَتَعَالَى) a go so kala' o gona o manga kaadn iyan. KknaIn iyan sa matolangd a mataan a so Allāh (سُبْحَانَهُ وَتَعَالَى) a Mahasoti a go Maporo' na skaniyan i phapaar sii ko btad o kibabatog ko kalangolangon iyan a pd on so manosiya. Kikilalaan iyan so kaliwanag o manga tanda' a go papata' a toos o bagr o Allāh (سُبْحَانَهُ وَتَعَالَى) a da katamani a so mapapayag ko waraan o manga kaadn iyan, sabap roo na pkiporo' a go pphamondiyong so paratiaya niyan ko Allāh (سُبْحَانَهُ وَتَعَالَى) sa lalayon iyan katatadman a go ron pphanarig.

Pitharo' o Allāh (سُبْحَانَهُ وَتَعَالَى) sii ko Qur'ān a katii so pd ko maana niyan a:

إِنَّ فِي خَلْقِ السَّمَاوَاتِ وَالْأَرْضِ وَاخْتِلَافِ اللَّيْلِ وَالنَّهَارِ لَآيَاتٍ لِّأُولِي الْأَلْبَابِ ﴿١٩٠﴾ الَّذِينَ يَذْكُرُونَ اللَّهَ قِيَامًا وَقُعُودًا وَعَلَىٰ جُنُوبِهِمْ وَيَتَفَكَّرُونَ فِي خَلْقِ السَّمَاوَاتِ وَالْأَرْضِ رَبَّنَا مَا خَلَقْتَ هَذَا بَاطِلًا سُبْحَانَكَ فَقِنَا عَذَابَ النَّارِ ﴿١٩١﴾

Mataan a kadadalman so kiaadna ko manga langit a go so lopa' a go so giikapakazambi' o gagawii a go so dawndaw sa manga tanda' a rk o manga lalantas i pamikiran ﴿190﴾ A siran oto so tatadman iran so Allāh ko katitindg iran, go so kaoontod iran, a go sii ko kaiiga' iran a gii ran pamimikirann so kiaadna ko manga langit a go so Doniya (sa gii ran tharoon) a: Kadnan ami da' Nka ini adna sa ba da' a bali niyan, miasotisoti Ka sa lindinga kami Nka ko siksa' ko Naraka' ﴿191﴾. (Surah Ali Imrān 190-191.

Manga Oripn o Allāh.

Patoray dn a mabaloy ka a maonotn ko manga sogoan o Kadnan ka, sa mabaloy ka a matolangd i kapangongonotan a mangangalimbabaan ka on sii ko langowan a manga btad ka. Sa o ba nka lawanga so manga tamana' a inibtad o Allāh (سُبْحَانَهُ وَتَعَالَى), sa thakna' ka ko manga onayan a inisogo' o Allāh (سُبْحَانَهُ وَتَعَالَى) mapiya pn sopak oto ko kabaya aka. Aya kakhatpngi ko kabbnar o paratiaya nka na sii thatampat ko kaphagonot inka ko manga sogoan o Allāh (سُبْحَانَهُ وَتَعَالَى) a go so Sogo' iyan sii ko langowan o btad ka ko kaoyagoyag ko maito on a go so mala' on sa da dn a madalm on a sankaan antaa ka kaplombat a go kasankot.

Pitharo' o o Rasūlullāh (صَلَّى اللهُ عَلَيْهِ وَسَلَّمَ) a:

Di phakaparatiaya so isa rkano taman sa di mabaloy so baya' a ginawa niyan a makaonot ko nganin a minitalingoma ko. (an Nawawi Hadith Blg. 41).

Pitharo' o Allāh (سُبْحَانَهُ وَتَعَالَى) sii ko Qur'ān a katii so pd ko maana niyan a:

فَلَا وَرَبِّكَ لَا يُؤْمِنُونَ حَتَّىٰ يُحَكِّمُوكَ فِيمَا شَجَرَ بَيْنَهُمْ ثُمَّ لَا يَجِدُوا فِي أَنفُسِهِمْ
حَرَجًا مِّمَّا قَضَيْتَ وَيُسَلِّمُوا تَسْلِيمًا ﴿٦٥﴾

﴿Di', ibt ko Kadnan ka ka di' siran pharatiaya sa taman sa di ran rka mapakikokom a nganin a kiasawalan kiran, oriyan iyan na da' a matoon iran sa ginawa iran a margn ko nganin a inikokom ka, sa makambayorantang siran sa tarotop a kapagislam﴾. (Surah an Nisā' 4:65).

Sabap san na miatankd a paliogat so kathapapay a go kapangononotan o Muslim sii ko kabaya' o Allāh (سُبْحَانَهُ وَتَعَالَى) a go so Sogo' iyan. O mada' ankanan, na da' a paratiaya a malalamba' rka hay Muslim a go da pn a khailay a Islam a mapapayag sii rka. Sii sankanan na so thitho a Muslim na di dn zilay sa ba pagawa' ko lalan o Allāh (سُبْحَانَهُ وَتَعَالَى) a mathitho a go di niyan imbagak so manga sogoan o Rasūlullāh (صَلَّى اللهُ عَلَيْهِ وَسَلَّمَ), sa amay ka ska a Muslim na manggolawla nka so tarotop a kapangongonotan na khabaloy ka a mama odi' na babay a miapatot a pagolowanan iyan a ginawa niyan a go so walay niyan a go so pamiliya niyan sa mikdng iyan siran ko lalan a ontol sa taman sa kisampay ran ko Allāh (سُبْحَانَهُ وَتَعَالَى).

Manga Oripn o Allāh.

So Muslim a gianann i btad iyan na maggdam iyan so kala' o atastanggongan iyan ko kaziapa niyan ko manga taw a matatago' sa taat iyan a datar o manga wata iyan a go so pamiliya niyan.

Amay ka so manga taw a matatago' sa tangan iyan na indadaraynon iran so kapangongonotan ko sogoan o Allāh (سُبْحَانَهُ وَتَعَالَى) a go so Sogo' iyan na paliogat on a kalalangi niyan kiran sa osiatan iyan siran sa mapiya, ka atastanggongan iyan siran ko kathoro'a niyan kiran ko Islam sa okit a mapiya.

Pitharo' o Rasūlullāh (صَلَّى اللهُ عَلَيْهِ وَسَلَّمَ) a:

Langon kano na pphagipat, na oman i isa rkano na ipagiza' on so pphagipatn iyan. Pianothol i al Bukhārī a go si Muslim.

Skaniyahn oto a Muslim na tatankdn iyan sa mabagr so okoran o Allāh (سُبْحَانَهُ وَتَعَالَى) a pkhisogat on ko oman dn i kotika' a go masa sa tatadman iyan so katharo' o Rasūlullāh (صَلَّى اللهُ عَلَيْهِ وَسَلَّمَ) a:

Piakammsa so btad o Muslim, a so manga btad iyan na playa dn sii ko mapiya. O masogat a mapiya na manalamat skaniyan ko Allāh na mabaloy ron oto a mapiya, na o masogat a margn (tioba') na phantang a go zabar na mabaloy ron oto a mapiya. (Pianothol o al Bukhari).

So thitho a Muslim na tatarimaan iyan a so kaparatiayaa sii ko kabaya' a go okoran o Allāh (سُبْحَانَهُ وَتَعَالَى) na isa oto ko onayan a go polaos o paratiaya. Sa langowan a miakasogat on na miokit oto sa kabaya' o Allāh (سُبْحَانَهُ وَتَعَالَى) a go so okoran iyan sa

datar oto a lagowan a da on misogat na miokit sa kabaya' o Allāh (سُبْحَانَهُ وَتَعَالَى) a go okoran iyan. So kapaparatiayaa niyan san na pphakala' so balas a khakowa niyan sii ko Kadnan iyan, sa khabaloy skaniyan a oripn a phagontong sankā'i a doniya na sampay sa alaongan a maori.

Gioto i maana ankoto a katharo' o o Rasūlullāh (صَلَّى اللهُ عَلَيْهِ وَسَلَّمَ) a so btad o Mu'min na palaya dn madadalm sa mapiya mlagid o so btad iyan na margn ko kiasagad o tioba' antaa ka malbod ko kiakowaa niyan ko limo' o Kadnan iyan, sabap roo na mimbalooy skaniyan a Muslim a salakaw dn ko manga taw ko liawaw o lopa' sabap ko kambabatang a go kathitimbang o btad iyan a di zosoramig, sa miatankd iyan a skaniyan na pd ko ummah o Rasūlullāh (صَلَّى اللهُ عَلَيْهِ وَسَلَّمَ) a maontol a zosokod ko langowan a tindg iyan ko kaoyagoyag.

Manga Oripn o Allāh.

Amay ka mabaloy ka a datar o inaloy tano na khaadn ka a mama odi' na babay a matolangd i tindg sa kapmbalingan ka ko lalan o Allāh (سُبْحَانَهُ وَتَعَالَى) sa nggolalan sa kapanawbat ko manga dosa a mianggolawla nka. Sabap sa ska na manosiya a waraan iyan so kapkhadosa, sa anda i kagdam anka sa miaawat ka ko lalan o Islam a mathitho sabap ko kiapakanggolawala sa manga dosa na pagapas ka ko kapananadmi nka ko Allāh (سُبْحَانَهُ وَتَعَالَى) ka anka makathanotanod ko kiaribat sa mapanongganoy nka so rila' a go maap o Kadnan ka.

Pitharo' o Allāh ﷻ sii ko Qur'ān a katii so pd ko maana niyan a:

إِنَّ الَّذِينَ اتَّقَوْا إِذَا مَسَّهُمْ طَائِفٌ مِّنَ الشَّيْطَانِ تَذَكَّرُوا فَإِذَا هُمْ مُبْصِرُونَ ﴿٢٠١﴾

Mataan a so siran oto a miamananggila' na igira miasogat siran a waswas (bodiok) a phoon ko Shaytān na makatadm siran na mitkaw siran a makathanotanod siran. (Surah al A'rāf 7:201).

Sii sa masa nan na khapno' so poso' iyan a kabaya' a go arap ko Allāh (سُبْحَانَهُ وَتَعَالَى). Ka so poso' a mappno' a kabaya' a go kalk ko Allāh (سُبْحَانَهُ وَتَعَالَى) na di khalankoloban o kandaraynon a khasabapan ko waswas o Shaytan. So pman so manga taw a kalilipatan iran lalayon so btad o Allāh (سُبْحَانَهُ وَتَعَالَى) a Kadnan iran na siran i lalayon pkhidolas ko dolasan o manga dosa. So poso' o Mu'min na gioto i poso' a lalayon dn pphagapas ko Allāh (سُبْحَانَهُ وَتَعَالَى) sa nggolalan ko kapangni sa rila' a go kapanawbat, sa sii niyan pkhagdam so pithamanan a kapipiya ginawa sii ko gii niyan kanggalbka ko manga simba mapiya pn kasasaogan oto sa mapn'd a galbk a di pkhababayaan o waraan o manosiya.

Manga Oripn o Allāh.

Aya mala' a antap o miaratiaya na so katankda niyan sa miakanggalbk sa manga simba a khisoat iyan ko Allāh (سُبْحَانَهُ وَتَعَالَى) a Kadnan iyan. Skaniyan oto a Mu'min na babantakn iyan so kasokata niyan ko kasosoat o Allāh (سُبْحَانَهُ وَتَعَالَى) sii ko langowan a galbk iyan. Di niyan phanontotn so kasoat o manga taw sa itongan o kasopaka niyan ko kabaya' o Allāh (سُبْحَانَهُ وَتَعَالَى), ogaid na pnggalbkkn iyan so ikhasoat o Allāh (سُبْحَانَهُ وَتَعَالَى) mapiya pn miagowad so manga taw sa da siran on masoat.

Pitharo' o Rasūlullāh (صَلَّى اللهُ عَلَيْهِ وَسَلَّمَ) a:

Sa taw a panontotn iyan so kasoat o Allāh sa sopak ko kasosoat o manga taw, na so Allāh na ziyapn iyan skaniyan phoon kiran. Na sa taw a panontotn iyan so kasosoat o manga taw sa sopak ko kabaya' o Allāh na so Allāh na iphilak iyan skaniyan sa izana niyan ko siyap o manga taw (sa gioto dn i kiaantiyor iyan). Pianothol o at Tirmidī.

Amay ka sabotn anan o Muslim na mabaloy skaniyan a makikilala niyan so manga nganin a ikhasoat o Allāh (سُبْحَانَهُ وَتَعَالَى) a go so manga nganin a ipkhagowad iyan, sa miakowa niyan so panaks a mapiya a da dn a ba niyan kaphliwag a gioto so taks a aya katatagoan ko kasosoat o Allāh (سُبْحَانَهُ وَتَعَالَى) na so kasopaka ko baya' a ginawa o manga taw a pd on so ginawa niyan, na so kaonoti ko baya' a ginawa o manga taw a pd on skaniyan na gioto so kasopaka ko kabaya' o Allāh (سُبْحَانَهُ وَتَعَالَى).

Paliogat ko Muslim a mabaloy a mabagr i tindg ko ginawa niyan sa di phangongonotan sa pamikiran ko salakaw ron amay ka di niyan masigoro a so pamikiran iran odi na kabaya' iran on na makasosonkad ko kabaya' o Allāh (سُبْحَانَهُ وَتَعَالَى) a go so Rasūlullāh (صَلَّى اللهُ عَلَيْهِ وَسَلَّمَ). Andai kapakaapas san o Muslim na mimbalo a maradika' a minikhapaar iyan so langowan a btad iyan, sa khaompiyaan iyan sa tarotop sii ko langowan a katampar a ron pphagintaw sa khatonay niyan so manga simba niyan sa mapiya.

Adn pman a manga taw babay mama a totontotn iyan a skaniyan na Muslim a tarotop ogaid na pkhailay tano so manga galbk iyan a di matotolabos a ba niyan sosonkadn ko kabaya' o Allāh (سُبْحَانَهُ وَتَعَالَى). Aya ibarat oto na adn a pkhailay nka a mama odi' na babay a barasambayang ko masjid oman dn i wakto, ogaid na pkhailay nka a sii ko dagangan iyan sa padian na giimriba odi na giimlilimpang ko dagangan iyan, na giankanan a Muslim a datar anan na patoray a kaompiyaan iyan a ginawa niyan a go so galbk iyan ka mataan a di niyan matatarotop so agama niyan sa di niyan khakowa so kasosoat o Allāh (سُبْحَانَهُ وَتَعَالَى) a Kadnan iyan.

Manga Oripn o Allāh.

So Islam a agama tano na palaya iyan dn pagompiyaan so btad tano a barandiya' a go rahasiyan mapayag antaa ka masoln, maito antaa ka mala', sa da dn a imbagak iyan on a mlk bo' inonta a pagompiyaan iyan langon. Sabap roo, na o pkhailay tano so manga ginawa tano a go so manga salakaw a di matatarotop so kiaompiyai ron o Islam na patoray rkitano a kapanagontaman tano sa kaompiyai tano ron sa tarotop ka an tano makowa so mapiya sankai a doniya na sampay sa alongan a maori.

Manga Oripn o Allāh.

O ilaya tano so Qur'ān ko manga onayan o bandingan iyan, na matoon tano a matitin's ko tlo a onayan a mala': Paganay ron na so kiapakitokawi niyan ko btad o Allāh (سُبْحَانَهُ وَتَعَالَى) a Kadnan o Manosiya a aya bo' khirk ko simba a go so kazoasoat o inadn iyan. Sabap roo na aya madakl a *kalimah* i kialoy ko Qur'ān na so ingaran o Allāh (سُبْحَانَهُ وَتَعَالَى) a miaaloy ron sa sobra so dowā nggibo a go walo gatos makasoy. Ika dowā; na so Manosiya, a piماغosay o Qur'ān so btad iyan a go so waraan iyan so manga kabaya' iyan a go so ginawa niyan, sabap sa skaniyan i pakapnggolalann ko mala' a galbk a go insana a so kapzoasoata niyan ko Allāh (سُبْحَانَهُ وَتَعَالَى) a Kadnan iyan a miadn on. Ika tlo; So bandingan ko Simba a skaniyan so langowan a katharo' a go galbk a ikhasoat o Allāh (سُبْحَانَهُ وَتَعَالَى) a go ikhababaya' iyan, a gianan i antap o kiaadna

o Allāh (سُبْحَانَهُ وَتَعَالَى) ko Jin a go so manosiya a go gianan i ponsowan a rarikan a onayan a pnggalbkn o manosiya ko kaoyagoyag iyan.

Pitharo' o Allāh (سُبْحَانَهُ وَتَعَالَى) sii ko Qur'ān a katii so pd ko maana niyan a:

Da ko adna so Jin a go so manosiya inonta a pantag sa an ako iran masimba.

Samanan na miatankd a aya sabap a kiaadna ko manosiya na so kazimbaa niyan ko Allāh (سُبْحَانَهُ وَتَعَالَى) sa gianan i antap o kiaadna on a go so simba i pnggalbkn iyan ko kaoyagoyag iyan.

وَأَقُولُ قَوْلِي هَذَا وَأَسْتَغْفِرُ اللَّهَ لِي وَلَكُمْ وَلِسَائِرِ الْمُسْلِمِينَ مِنْ كُلِّ ذَنْبٍ فَاسْتَغْفِرُوهُ
إِنَّهُ هُوَ التَّوَّابُ الرَّحِيمُ

Wa aqūlu qawlī hādā wa astagfirullāha lī wa lakum wa lisāiril Muslimīn min kulli dambin fastagfirūhu innahu Huwat Tawwābur Rahīm.



المسلم وربّه تعالى
Khutbah a Ika Dowā
(al Khutbah 1)

الْحَمْدُ لِلَّهِ رَبِّ الْعَالَمِينَ ، وَالصَّلَاةُ وَالسَّلَامُ عَلَى رَسُولِهِ الْكَرِيمِ ، مُحَمَّدِ بْنِ عَبْدِ اللَّهِ
وَعَلَى آلِهِ وَصَحْبِهِ أَجْمَعِينَ.

al hamdulillāhi rabbil ālamīn, wassalātu was salāmu alā rasūlihil karīm, Mohammasin bin Abdillāh, wa alā ālihi wa sahbihi ajmaīn.

Manga Oripn o Allāh, Gianka'i a miapamagosay tano a bandingan a so **Muslim a go so Kadnan iyan**, na paliogat a miasabot tano anan sa miakilala tano sa mapayag so kiphapantagn tano ko Kadnan tano a Mahasoti a Maporo', ka gianan i pamotosan o knal a go so kata'o sa sa dn sa taw a di niyan katawan so kiphapantagn iyan ko Allāh ﷺ a Kadnan iyan, na tomo pn so binatang a di skaniyan ka da' a bali o kaoyagoyag iyan sii sankai a doniya na sampay sa alongan a maori.

وَقَالَ رَبُّكُمْ ادْعُونِي أَسْتَجِبْ لَكُمْ.

Wa qāla Rabbukum ud'ūnī astajib lakum.

اللَّهُمَّ إِنَّا نَسْأَلُكَ خَشْيَتِكَ فِي الْغَيْبِ وَالشَّهَادَةِ ، وَنَسْأَلُكَ كَلِمَةَ الْحَقِّ فِي الرِّضَا وَالْغَضَبِ ، وَنَسْأَلُكَ الْقَصْدَ فِي الْغِنَى وَالْفَقْرِ ، وَنَسْأَلُكَ نَعِيمًا لَا يَنْفَدُ وَنَسْأَلُكَ قُرَّةَ عَيْنٍ لَا تَنْقَطِعُ ، نَسْأَلُكَ الرِّضَا بَعْدَ الْقَضَاءِ ، وَنَسْأَلُكَ بَرْدَ الْعَيْشِ بَعْدَ الْمَوْتِ ، وَنَسْأَلُكَ لَذَّةَ النَّظَرِ إِلَى وَجْهِكَ ، وَالشَّوْقَ إِلَى لِقَائِكَ ، فِي غَيْرِ ضَرَاءٍ مُضِرَّةٍ وَلَا فِتْنَةٍ مُضِلَّةٍ ، اللَّهُمَّ زَيِّنَا بِزِينَةِ الْإِيمَانِ وَاجْعَلْنَا هُدَاةً مُهْتَدِينَ.

Allāhumma innā nas'aluka khashyataka fil gaybi was shahādati, wa nas'aluka kalimatal haqqi fir ridhā wal gadhabi, wa nas'alukal qasda fil ginā wal faqri, wa nas'aluka naīman lā yanfadu wa nas'aluka qurrata aynin lā tanqatī'u, nas'alukar ridhā ba'dal qadhā'i, wa nas'aluka bardal ayshi ba'dal mawti, wa nas'aluka laddatan nadhari ilā wajhika, was shawqa ilā liqā'ika, fī gayri dharrā'a mudhirratin wa lā fitnatin mudillatin, allāhumma zayyannā bizīnatil imāni waj'alnā hudātan muhtadīn.

Yā Allāh, pagarapn ami Rka so kalk Rka sii ko gayb, go sii ko kamamasaan, go phangnin ami Rka so katharo' sa bnar ko masa a kasoso'at a go sii ko masa a rarangit, go pagarapn ami Rka so kathanka sii ko kakhakawasa a go sii ko kammmri, go phangni kami Rka sa limo' a di khalngan, go phangni kami Rka sa iphakapiya ginawa a di khapinda, phangnin ami Rka so kasosoat ko oriyān o okoran, go phangnin ami Rka so kalngaw o kaoyagoyag ko oriyān o kapatay, go phangnin ami Rka so kapiya o kakhailaya mi ko paras Ka, go so kadali ko kakhatmowa Rka, sa da' a antiyor on a phaminasa, go da pn a tioba on a phakadadag, yā Allāh, pharayasani kami Nka sa parayasan a paratiaya, go baloya kami Nka a giimanoro' a khikatotoro'.

اللَّهُمَّ إِنَّا نَسْأَلُكَ فِعْلَ الْخَيْرَاتِ ، وَتَرْكَ الْمُنْكَرَاتِ ، وَحُبَّ الْمَسَاكِينِ ، وَأَنْ تَغْفِرَ لَنَا
وَتَرْحَمَنَا ، وَإِذَا أَرَدْتَ فِتْنَةَ قَوْمٍ فَتَوَفَّنَا غَيْرَ مَفْتُونِينَ ، وَنَسْأَلُكَ حُبَّكَ ، وَحُبَّ مَنْ
يُحِبُّكَ ، وَحُبَّ كُلِّ عَمَلٍ يُقَرِّبُنَا إِلَى حُبِّكَ.

Allāhumma innā nas'aluka fi'lal khayrāti, wa tarkal munkarāti, wa hubbal masākina, wa an tagfira lanā wa tarhamanā, wa idā aradta fitnata qawmin fatawaffanā gayra maftūnīn, wa nas'aluka hubbaka wa hubba man yuhubbuka, wa hubba kulli amalin yuqarribunā ilā hubbika.

Yā Allāh, pagarapn ami Rka so kapakanggolawla sa manga pipiya, go so kibagakn ko manga rarata, go so kababayai ko miskin, go rilai kami Nka ago kalimoon kami Nka, na amay ka adn a kabayaan Ka a khapitna aka sa isa ka qawm na tarimaa kami Nka a di kami matitiyoba, go phangnin ami Rka so kababayai ami Rka, go so kababayai ami ko taw a pkhababayaan Ka niyan, go so kababayai ami ko langowan a galbk a mipakarani kami niyan sii ko kapkhababayai Rka.

اللَّهُمَّ إِنَّا نَسْأَلُكَ مِنَ الْخَيْرِ كُلِّهِ ، عَاجِلِهِ وَآجِلِهِ ، مَا عَلِمْنَا مِنْهُ وَمَا لَمْ نَعْلَمْ ، وَنَعُوذُ
بِكَ مِنَ الشَّرِّ كُلِّهِ عَاجِلِهِ وَآجِلِهِ ، مَا عَلِمْنَا مِنْهُ وَمَا لَمْ نَعْلَمْ.

Allāhumma innā nas'aluka minal khayri kullihi, 'ājilihi wa ājilihi, mā alimnā minhu wa mā lā na'lamu, wa na'udu bika minas sharri kullihi, 'ājilihi wa ājilihi, mā alimnā minhu wa mā lā na'lamu.

Yā Allāh, pagarapn ami Rka so langowan a mapiya, so magaan on ago so matataalik on, so katawan ami ron, go so di ami ron katawan, go mlindong kami Rka phoon ko langowan o marata, so magaan on go so matataalik on, so katawan ami ron, go so di ami ron katawan.

اللَّهُمَّ اقْسِمْ لَنَا مِنْ خَشْيَتِكَ مَا تُحُولُ بِهِ بَيْنَنَا وَبَيْنَ مَعَاصِيكَ ، وَمِنْ طَاعَتِكَ مَا تُبَلِّغُنَا
بِهِ جَنَّتِكَ ، وَمِنْ الْيَقِينِ مَا تُهَوِّنُ بِهِ عَلَيْنَا مَصَاعِبَ الدُّنْيَا ، اللَّهُمَّ مَتَّعْنَا بِأَسْمَاعِنَا
وَأَبْصَارِنَا وَقُوتَاتِنَا مَا أَحْيَيْتَنَا ، وَاجْعَلْهُ الْوَارِثَ مِنَّا ، وَاجْعَلْ ثَأْرَنَا عَلَى مَنْ ظَلَمْنَا

وَأَنْصُرْنَا عَلَى مَنْ عَادَانَا ، وَلَا تَجْعَلْ مُصِيبَتَنَا فِي دِينِنَا وَلَا تَجْعَلِ الدُّنْيَا أَكْبَرَ هَمِّنَا وَلَا مَبْلَغَ عِلْمِنَا ، وَلَا تُسَلِّطْ عَلَيْنَا مَنْ لَا يَرْحَمُنَا.

Allāhumaqsim lanā min khashyatika mā tahūlu bihi baynanā wa bayna maāsika, wa min tāatika mā tuballigunā bihi jannataka, wa minal yaqīni mā tuhawwinu bihi alaynā masāibad dunyā, allāhumma matti'nā biasmāinā wa absārinā wa quwwātinā mā ahyaytanā waj'alhul wāritha minnā, waj'al tha'ranā alā man dhalamanā wan surnā alā man ādānā, wa lā taj'al musibatānā fi dīninā wa lā taj'alid dunyā akbara hamminā wa lā mablaga ilminā, wa lā tusallit alaynā man lā yarhamunā.

Yā Allāh, bagiin ka rkami so pd ko kalk Rka a kharnding iyan so It ami ago so It o kasopaka Rka, so pd ko onot Rka a khisamapay kami niyan ko sorga aka, go so yaqin a maphakakhap iyan rkami so manga tiyoba ko doniya, yā Allāh baloy Anka so saop ami a sii makatana ko taw a liyalim kami niyan, go tabangi kami Nka ko taw a rinido kami niyan, go di Nka mbaloya so tiyoba ami a sii matago ko agama mi, go di Nka mbaloya so doniya a aya mala a awid a akal ami, go di pn o ba aya khasampayan ko katao ami, go di Nka rkami pakaphangondatoa so taw a di kami niyan iphangalimo.

اللَّهُمَّ إِنَّا نَسْأَلُكَ مُوجِبَاتِ رَحْمَتِكَ وَعَزَائِمَ مَغْفِرَتِكَ ، وَالسَّلَامَةَ مِنْ كُلِّ إِثْمٍ وَالْغَنِيمَةَ مِنْ كُلِّ بَرٍّ وَالْفَوْزَ بِالْجَنَّةِ وَالنَّجَاةَ مِنَ النَّارِ.

Allāhumma innā nas'aluka mūjibāti rahmatika, wa 'azāima magfiratika, was salāmata min kulli ithmin, wal ganīmata min kulli birrin wal fawza bil jannati wan najāta minan nāri.

Yā Allāh, phangnin ami Rka so phamakatankd ko limo oka, go so thkhs o rila aka, go so kapakalidas ko langowan a dosa, go so kaparoliya ko langowan a mapiya, go so kapagontonga ko sorga, go so kapakalidas ko naraka.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

Ya Allāh, bgi kami nka ko doniya sa mapiya a go sii ko akhirat sa mapiya a go lindinga kami nka ko siksa ko naraka.

سُبْحَانَ رَبِّكَ رَبِّ الْعِزَّةِ عَمَّا يَصِفُونَ وَسَلَامٌ عَلَى الْمُرْسَلِينَ وَالْحَمْدُ لِلَّهِ رَبِّ الْعَالَمِينَ.

Sub'hāna Rabbika Rabbil izzati ammā yasifūna wa salāmun alal mursalīna wal hamdulillāhi Rabbil ālamīn.

Wa Aqīmus Salāh...